

四庫全書

集部

# 欽定四庫全書

集部

漢魏六朝百三家集卷七十三

四

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官中書臣高 中

謄錄監生臣王利賓

欽定四庫全書

漢魏六朝百三家集卷七十三

蕭子良集題詞

蕭雲英著內外文筆數十卷史謂其無文采多  
勸戒及讀任昉行狀則云天才博瞻學綜該明  
沛獻東平淮南陳思方斯蔑如予折衷羣論未  
得其平比覽遺文斥臺使憂旱沴獄圖泉鑄動  
見規啓仁哉言乎何其痼瘵乃心也雲英敬信

釋氏撰淨住子淨行法門三十一條苦言勤諷  
愍泣如雨射雉二啟奏告君父不離福業觀其  
惻隱懇誠身行津渡斷欲以王公努力建道場  
之幡擊甘露之鼓為黔首先倡而浮魚兆殃外  
寢大震天年不永其誰為乎齊武二十三男中  
多賢令文惠竟陵居長表帥皆病短折晉安諸  
王安能復存父夢曇華子罹刀酖未知西昌毒  
因在報應何等也王融見殺魏準破膽實竟陵

速殞之繇而涅槃寂滅以死為樂雲龍憂懼得  
無猶有未化者乎

目錄

啓

密啓武帝

又

車旗啓

諫射雉啓

又

諫斂役塘錢啓

上武帝請贈豫章王嶷啓

表

上讜言表

墾田表

書

與安陸侯緬書

答王僧虔書

答張融

答顧憲之

與法獻書

與孔中丞釋疑惑書

又

答孔中丞書

與南郡太守劉景綦書

漢魏六朝百三家集卷七十三目錄



欽定四庫全書

漢魏六朝百三家集卷七十三

明 張溥 輯

蕭子良集

啟

密啟武帝

臣思水潦成患良田沃壤變為汙澤農政告祥因高肆  
務播植既周繼以旱虐黔庶呼嗟相視褫氣夫國資於

民民資於食匪食匪民何以能政臣每一念此寢不便  
席本始中郡國大旱宣帝下詔除民租今聞所在逋餘  
尚多守宰嚴期兼夜課切新稅力尚無從故調於何取  
給政當相驅為盜耳愚謂逋租宜皆原除少降停恩微  
紓民命自宋道無章王風陵替竊官假號駢門連室今  
左民所撿動以萬數漸漬之來非復始適一朝洗正理  
致沸騰小人之心罔思前恩董之以威反怨後罰獸窮  
則觸事在匪輕齊有天下日淺恩洽未布一方或饑當

加優養愚謂自可依源削除未宜便充猥役且部曹檢  
校誠存精密令史奸黠鮮不容情情既有私理或枉謬  
耳目有限羣狡無極變易是非居然可見詳而後取於  
事未遲明詔深矜獄圜恩文累墜今科網嚴重稱為峻  
察負罪離讐充積牢戶暑時鬱蒸加以金鐵聚憂之氣  
足感天和民之多怨非國福矣頃土木之務甚為殷廣  
雖役未及民勤費已積炎旱致災或繇於此皇明載遠  
書軌未一緣淮帶江數州地耳以魏方漢猶一郡之譬

以今比古復為遠矣何得不愛其民緩其政救其危存其命哉湘區與密蠻寇熾彊如聞南師未能挫戮百姓齊民積年塗炭疽食侵淫邊虞方重交州負絕一垂寔惟荒服恃遠後賓固亦恒事自青德啓運款關受職置之度外不足絃言今縣軍遠伐經途萬里衆寡事殊客主勢異以逸待勞全勝難必又緣道調兵以足軍力民丁烏合事乖習銳廣州積歲無年越州兵糧素乏加以發借必致恒擾愚謂叔獻所請不宜聽從取亂侮亡更

俟後會雖緩歲月必有可禽之理差息發動費役之勞  
劉楷見甲以助湘中威力既舉蟻寇自服

又啓

臣一月入朝六登文陛廣殿稠人裁奉顏色縱有所懷  
豈敢自達比天青亟見地孽亟臻民下妖訛好生嚙啗  
穀價雖和比室饑慊縑纈雖賤駢門裸質臣一念此每  
入心骨三吳輿區地惟河輔百度所資罕不自出宜在  
蠲優使其全富而守宰相繼務在裒剋圍桑品屋以准

欽定四庫全書

澤州六朝百三詩集  
卷七十三

三

資課致令斬樹發瓦以充重賦破民財產要利一時東  
郡使民年無常限在所相承准令上直每至州臺使命  
切求懸急應充猥役必繇窮困乃有畏失嚴期自殘軀  
命亦有斬絕手足以避徭役生育弗起殆為恒事守長  
不務先富民而唯言益國豈有民貧於下而國富於上  
邪又泉鑄歲遠類多翦鑿江東大錢十不一在公家所  
受必須輪郭完全遂買本一千加子七百猶求請無地  
極革相驅尋完者為用既不兼兩回復遷貿會非委積

徒令小民每嬰困苦且錢帛相半為制永久或聞長宰  
須令輸直進違舊科退容姦利八屬近縣既在京畿發  
借徵調寔煩他邑民特尤貧連年失稔草衣藿食稍有  
流亡今農政就興宜蒙賑給若逋課未上許以申原究  
豫二藩雖曰舊鎮往屬兵虞累棄鄉土密邇寇庭下無  
安志編草結菴不違涼暑扶淮聚洛靡有生向俱稟人  
靈獨絕溫飽而賦歛多少向均失實謂凡在荒民應加  
蠲減又司市之要自昔所難頃來此役不繇才舉竝條

其重貲許以賈銜前人增估求俠後人加稅請代如此輪回終何紀極兼復交關津要共相脣齒愚野未閑必加陵誑罪無大小橫沒貲載凡求試穀帛類非廉謹未解在事所以開容夫獄訟惟平畫一在制雖恩家得罪必宜申憲鼎姓貽謗最合從網若罰典惟加賤下辟書必蠲世族懼非先王立理之本尚書列曹上應乾象如聞命議所出先諮於都都既下意然後侍郎謹寫關行愚謂郎官尤宜推擇宋運告終戎車屢駕寄名軍牒動



竊數等故非分充朝資奉殷積廣越邦宰梁益郡邑參  
差調補寔允事機且此徒冗雜罕遵王憲嚴加廉視隨  
違彈斥一二年間可減大半

車旗啓

臣聞車旗有章載自前史器必依禮服無舛法凡蓋員  
象天軫方法地上無二天之儀下設兩蓋之飾求之志  
錄恐為乖衷又假為麟首加乎馬頭事不師古鮮或可  
施

諫射雉啓

鑾輦亟動天蹕屢巡陵犯風煙驅馳野澤萬乘至重一  
羽甚微從甚微之懼忽至重之誠頃郊郭以外科禁嚴  
重匪直芻牧事罷遂乃寃掩殆廢且田月向登桑時告  
至士女呼嗟易生嚙議棄民從欲理未可安曩時巡幸  
必盡威防領軍景先啓事赤斧堅甲利兵左右屯衛今  
馳騫外野交待疎闊晨出晚還頓遺清道此實愚臣最  
所震迫狡虜玩威甫獲款關二漢全富猶加曲待如聞

使臣頻亦怨望前會東宮遂形言色昔宋氏遣使舊列  
階下劉纘銜使始登朝殿今既反命宜賜優禮伏謂中  
堂雲構實惟峻絕檐陛深嚴事隔涼暑而別為一室如  
或有疑邊帶廣途訛言孔熾毀立之易過於轉圓若依  
舊制通敞實允觀聽頃市司驅扇租估過刻吹毛求瑕  
廉察相繼被以小罪責以重備愚謂宜勅有司更詳優  
格臣年方朝賢齒未相及以管窺天猶知失得廊廟之  
士豈間是非未聞一人開一說為陛下憂國家非但面

從亦畏威耳臣若不啓陛下於何聞之

又

忽聞外議伏承當更射雉臣下情震越心懷憂悚猶謂  
疑妄事不必然伏度陛下以信心明照所以傾金寶於  
禪靈仁愛廣洽得使禽魚養命於江澤豈惟國慶民惟  
乃以翺翔治樂夫衛生保命人獸不殊重軀愛體彼我  
無異故禮云聞其聲不食其肉見其生不忍其死且萬  
乘之尊降同匹夫之樂天殺無辜傷仁害福之本菩薩

不殺壽命得長施物安樂自無恐怖不惱衆生身無患  
苦臣見功德有此果報所以日夜勗勤厲身奉法實願  
聖躬康豫若此每至寢夢脫有異見不覺身心立就焦  
爛陛下常日捨財修福臣私心顚顚尚恨其少豈可今  
日見此事一損福業追悔便難臣此啓聞私心實切若  
是大事不可易改亦願陛下照臣此誠曲垂三思況此  
嬉遊之間非關當否而動輒傷生寔可深慎臣聞子孝  
奉君臣忠事主莫不靈祇通感徵祥證登臣近段仰啓

賜希受戒天心洞遠誠未達勝善之途而聖恩遲疑尚未垂履曲降尊極豈可今月復隨此事臣不隱心即實上啓

諫斂塘役錢啓

伏尋三吳內地國之闕輔百度所資民庶彫流日有困殆蠶農罕獲饑寒尤甚富者稍增其饒貧者轉鍾其弊可為痛心難以辭盡頃錢貴物賤殆欲兼倍凡在觸類莫不如茲稼穡難劬斛直數倍今機杼勤苦匹裁三百

所以然者實亦有繇年常歲調既有定期僮卹所上咸  
是見直民間錢多剪鑿鮮復完者公家所受必須員大  
以兩代一困於所貿鞭捶質繫益致無聊臣昔忝會稽  
粗閑物俗塘丁所上本不入官良由陂湖宜壅橋路須  
通均夫訂直民自為用若申分毀壞則年一修改若乙  
限堅完則終歲無役今郡通課此直悉以還臺租賦之  
外更生一調致令塘路崩蕪湖源泄散害民損政實此  
為劇建元初狡虜游魂軍用殷廣浙東五郡丁稅一千

乃有質賣妻兒以充此限道路愁窮不可聞見所逋尚  
多收上事絕臣登具啓聞即蒙蠲原而此年租課三分  
逋一明知徒足擾民實自弊國愚謂塘丁一條宜還復  
舊在所逋卹優量原除凡應受錢不限大小仍令在所  
折市布帛若民有雜物是軍國所須者聽隨價准直不  
必一應送錢於公不虧其用在私實荷其渥昔晉氏初  
遷江左草創絹布所直十倍於今賦調多少因時增減  
永初中官布一匹直錢一千而民間所輸聽為九百漸



及元嘉物價轉賤私貨則東直六千官受則匹准五百  
所以每欲優民必為降落今入官好布匹堪百餘其四  
民所送猶依舊制昔為損上今為刻下氓庶空儉豈不  
繇之救民拯弊莫過減賦時和歲稔尚爾虛乏儻值水  
旱寧可熟念且西京熾強實基三輔東都全固實賴三  
河歷代所同古今一揆石頭以外裁足自供府州方山  
以東深闕朝廷根本夫股肱要重不可不卹宜蒙寬政  
少加優養略其目前小利取其長久大益無患民資不

殷國財不阜也宗臣重寄咸云利國竊如愚管未見可  
安

上武帝請贈豫章王嶷啓

臣聞春秋所以稱王母弟者以尊其所重故也是以禮  
秩殊品爵命崇異在漢則梁王備出警入蹕之儀在晉  
則齊王具殊服九命之贈江左以來尊親是闕故致袞  
章之典廢而不傳寔繇人缺其位非禮虧省齊王故事  
與今不殊締構王業功迹不異凡有變革隨時之宜者

政緣恩情有輕重德義有厚薄若事籌前規禮無異則  
且梁齊闕令終之美猶饗褒贈之榮況故大司馬仁和  
著於天性孝悌終於立身節義表於勤王寬猛彰於御  
物奉上無艱劬之貌接下無毀傷之容淡矣止於清貞  
無喜愠之色悠然栖於靜默絕馳競之聲詩云靡不有  
初鮮克有終夫終之者理實為難在於今行無廢斯德  
東平樂於小善河間悅於詩書勲績無聞艱危不涉尚  
致卓爾不群英聲萬代況今協贊皇基經綸霸始功業

高顯清譽逾彰富貴隆重廉潔彌峻等古形今孰類茲  
美臣愚忖度未有斯例凡庶族同氣愛睦尚少豈有仰  
覩陛下垂友于之性若此者乎共起布衣俱登天貴生  
平遊處何事不同分甘均味何珍不等未嘗覩貌而天  
心不懽見形而聖儀不悅爰及臨危捨命親瞻喘息萬  
分之際沒在聖目號哭動乎天地感慟驚乎鬼神乃至  
撤膳移寢坐泣遷旦神儀損耗隔宿改容奉瞻聖顏誰  
不悲悚歷古所未聞記籍所不載既有若斯之大德而

典服之贈不彰如其脫致虧忘追改為煩不令千載之下物有遺恨其德不具美者尚荷嘉隆之命況事光先烈者寧可缺茲盛典臣恐有識之人容致其議且庶族近代桓溫庾亮之類亦降殊命伏度天心已當有在

表

上讜言表

前臺使督逋切調恒聞相望於道及臣至郡亦殊不踈凡此輩使人既非詳慎勤順或貪險崎嶇要求此役朝

辭禁門情態即異暮宿村縣威福便行但令朱鼓裁完  
鉞槩微具顧盼左右叱咤自專摘宗斷族排輕斥重脅  
逼津逮恐唱傳郵破岡水逆商旅半引逼令到下先過  
已船浙江風猛公私畏渡脫舫在前驅令俱發呵蹙行  
民固其常理侮折守宰出變無窮既瞻郭望境便飛下  
嚴符但稱行臺未顯所督先訶彊寺却攝群曹開亭正  
檣便振荆革其次絳標寸紙一日數至徵村切里俄刻  
十催四鄉所召莫辯枉直孩老士庶具令付獄或尺布

之逋曲以當匹百錢餘稅且增為千或誑應質作尚方  
寄繫東治萬姓駭迫人不自固遂漂衣敗力競致兼漿  
值今夕酒諧肉飲即許附申赦格明日禮輕貸薄便復  
不入恩科筐貢微闕筆撻肆情風塵毀謗隨忿而發及  
其狔赫轉積驚粟漸盈遠則分鬻他境近則託質吏民  
反請郡邑助民繇緩回刺言臺推信在所如聞頃者令  
長守牧離此每實非復近歲愚謂凡諸檢課宜停遣使  
密畿州郡則指賜勅遙外鎮宰明下條源既各奉別旨

人競自整雖復臺使盈湊會取正屬所徒相疑債反更淹懈凡預衣冠荷恩盛世多以間緩貽謗少為欺猾入罪若類以宰牧乖政則觸事難委不容課逋上綱偏覺非才但睽促差降各限一期如乃事速應緩自依違糾坐之坐之之科不必須重但令必行期在可肅且兩裝之船克擬千緒三坊寡役呼訂萬計每一事之發彌晨方辦粗計近遠率遣一部職散人領無減二十舟船所資皆復稱是長江萬里費固倍之較略一年脫得省者



息船優役寔為不少兼折姦減竊遠近暫安

墾田表

京尹雖居都邑而境壤兼跨廣袤周輪幾將千里紫原  
抱隰其處甚多舊遏古塘非惟一所而民貧業廢地利  
久蕪近啓遣五官殷瀾典籤劉僧瑗到諸縣循履得丹  
陽溧陽永世等四縣解并村耆辭列堪墾之田合計荒  
熟有八千五百五十四頃修治塘遏可用十一萬八千  
餘夫一春就功便可成立

書

與安陸侯緬書

緬封安陸侯為五兵尚書出為吳郡太守大  
著風績子良與書世祖嘉其能轉郢州刺史

竊承下風數十年來未有此政

南史姑蘇未有此政

答王僧虔書

左伯字子邑東萊人特工八分與毛弘等列  
亦擅名漢末又甚能作紙漢興有能代簡和  
帝時蔡倫工為之子邑尤得其妙故蕭子良  
答僧虔書○齊民要術韋仲將墨法醇煙一  
斤以膠五兩浸梲皮汁中下雞子白五枚真  
珠一兩麝香一兩合調下鐵臼搗三萬杵

子邑之紙妍妙輝光仲將之墨一點如漆伯英之筆窮

神盡意妙物遠矣邈不可追

張懷瓘書斷。法書要錄引王僧虔論書云謝靜謝

敷竝善寫經亦入能境居鍾亮之美邁古流今是以征南還有所得辱告竝五紙舉體精雋靈輿執玩反覆不能釋手雖太傅之婉媚玩好領軍之靜遯答緒方之茂如也昔杜度殺字甚安而筆體微瘦崔瑗筆勢甚快而結字小疎居處二者之間亦儔仲尼方於季孟也夫工欲善其事必先利其器伯喈非流紈體素不妄下筆若子邑之紙研染輝光仲將之墨一點如漆伯英之筆窮神靜思妙物遠矣邈不可追遂令思挂於弱毫數屈於陋墨言之使人於邑若三珍尚存四寶斯覲何但尺素信札動見模式將一字徑丈方寸千言也承天涼體豫復欲繕寫一賦傾遲暉采心目俱勞承閱覽祕府備觀羣跡崔張歸美於逸少雖一代所宗僕不見前古人之跡計

亦無以過於逸少既妙盡深絕便當得之實錄然觀前世稱目竊有疑焉崔杜之後共推張芝仲將謂之筆聖伯玉得其筋巨山得其骨索氏自謂其書銀鉤蠶尾談者誠得其宗劉德昇為鍾胡所師兩賢並有肥瘦之斷元鳴獲釘壁之歡師宜致酒簡之多此亦不能止長片狸骨右軍以為絕倫其功不可及由此言之而向之論或至投杖聊呈一笑不妄言耳○按子良書語在此內豈此即與僧虔書僧虔因論書及之耶首有謝靜謝敷數語屑告五紙者當一二謝所書其云征南還有所得考子良但為征北將軍又疑承天涼以下方為書意義未明附註此後

### 答張融

竟陵張欣時為諸暨令坐罪當死欣時父興世宋世討南譙王義宣官軍欲殺融父暢興

世以袍覆暢而坐得免興世卒融著高履負土成墳至是融啓竟陵王子良乞代欣時死

子良  
答曰

此乃是長史美事恐朝有常典不得如長史所懷

答顧憲之

憲之字士思吳郡吳人歷豫章太守大中大夫

憲之為南中郎長史行婺州事時司徒竟陵王於宣城臨成定陵三縣界立屯封山澤數百里禁民樵採憲之固陳不可言甚切直王答之即令無禁

非君無以聞此德音

梁書

與法獻書

遠法師一代名德志節清高潛山樹美四海餐風弟子  
闇昧謬蒙師範方欲仰稟仁化用洗煩慮不謂此疾奄  
成異世悲痛之心特不可忍遠上即既業行圓通曠劫  
希有弟子意不欲遺形影迹雜處衆僧墓中得別卜餘  
地是所願也方應樹剝表竒刻石銘德矣

與孔中丞釋疑惑書

覽君書具一二每患浮言之妨正道激烈之傷純和亦  
已久矣孟子有云君王無好智君王無好勇勇智之過

生乎患禍所遵正當仁義為本今因修釋訓始見斯行之所發誓念履行欲卑高同其美且取解脫之喻不得不小失存其大至於形外之間自不足及言真俗之教其致一耳取之者未達故橫起異同君云積業栖信便是言行相舛豈有奉親一毀一敬而云大孝未之前聞夫仁人之行非是殘害加其美廉潔之操不藉貪竊成其德如此則三歸五戒豈得一念而可捨十善八正寧瞥想之可遺未見輕其本而能重其末所謂本既傾矣

而後枝葉從之今云二途雖異何得相順此言故是見其淺近之談耳君非不覩經律所辨何為偏志一方埋沒通路夫士未嘗離俗施訓即世之教可以知之若云斯法空成詭妄更增疑惑應當毀滅就即而言閨門孝悌者連鄉接黨竟有幾人今可得以無其多絀諸訓誥經史箴誡悉可焚之不君今遲疑於內教亦復與此何殊哉所以歸心勝法者本不以禮敬標其心兢仰祇崇者不在我故忘物今之慙勤克己者政為君輩之



徒耳欲今相與去僇矜除慢傲節情慾制貪求修禮讓  
習謙恭奉仁義敦孝悌課之以博施廣之以汎愛賞之  
以英賢拔之以雋異復何慙於鬼神乎孜孜策勵良在  
於斯雖未能奉遵亦意不忘之今未有夜光之投而按  
劍已起欲相望於道德寧不多愧當繇未見此情故常  
信斯心耳在懷則不然每苦其不及司徒之府本五教  
是勸方其敦斯美行以率無慾使之詭諂佞望門而自  
矜浮偽蕩逸踐庭而變迹等彼息心之館齊此無慾之

臺不亦善乎一則仰順宸極普天之慈二則敬奉儲皇垂愛之善宵旦而警惕者正患此心無遂耳悠悠之語好自多端其云願善政言未知傷化之重儻令詭事以忠孝佞悅以仁義虛設以禮讓假枉以方直乃至一日克已天下歸仁況能旬則有餘所望過矣本自開心所納正若此矯不多如其此煩未廣故鄙薄深慨君正應規諫其乖開發未達云何言傷孝本語損義基於邑有懷非所望也若此事可棄則欣聞餘善又云未必勸人

持戒當令善繇下發必如此而弘教者放勛須四凶革  
而啓聖虞舜待商均賢而德明如斯而遂美其可望乎  
君之此意則應廣有所折便當詰堯以土階之儉嘉離  
宮之麗貶禹以茅茨之陋崇阿房之貴恥汲黯之正容  
榮祝鮀之媚色其餘節義貞信謙恭之德皆當改途而  
反面復何行之可修也凡聞於言必察其行覩於行必  
求於理若理不乖而行不越者請無造於異端真殊途  
同歸未必孱然一貫頃亦多有與君此意同者今寄言

此紙情不專一者厝心於疑妄國君普宣示之略言其懷無見髣髴翰迹易煩中不盡意比見君別更委悉也

又

夫人心之不同猶若其貌豈其容一而等其智乎覽有待之參差足見情靈之乖舛矣一得其志者非言談之所盡一背其途者豈游說之所翻見君雖復言面委盡而不及此處者良由彼我之見既異幸可各保其方差無須空構是非橫起謗議耳栖心入信者前良不無此

志今以效善之為樂故挫僑陵以待物君若以德越往  
賢聖逾前修智超羣類位極人貴者自可逍遙世表以  
道化物高其懷無求自足而退於前良恐未能懸絕空  
秉兩塗獨異勝法若悠悠相期本不及言意在不薄為  
復示斯懷耳比面別一二近聊有此釋滯兩卷想於外  
已當見之今送相示若已覽者付反幸無勞形目脫未  
覩者為可一歷意本不期他翻正是自釋疑滯耳君見  
之必當撫掌也

答孔中丞書

君此書甚佳宜廣示諸未達者

與南郡太守劉景蕤書

冬去因君與劉居士書今春得其返价辭趣翩翩足有才藻實子雲之筆札元瑜之書記伸復咨嗟彌用欽想此子含真抱璞比調雲霞背俗居幽寓歡林淑養志南荆可與卞寶爭價韜光梵服固同隋照共明雖顏段之栖遑偃仰揚鄭之寂漠恬淡取之若人信可同日而語

矣且道性天悠禪心自謚敦悅九部研味三乘在家菩  
薩行之而不難白衣居士即之而匪易逝將燭昏霾於  
慧炬拯淪溺於法橋扇靈夢之留風鏡貞林之絕影僕  
栖尚既同情契彌至而悠悠京苑間以江山假復神通  
遠邇冥交曉曙疇得寫析深襟辨明幽旨迹生滅之中  
談究真俗之諦義故重有別書招來畿邑居問道之次  
具為敦請此蘭山桂水既足逍遙儒侶玄宗復多朋往  
非以一爵相加豈其旌蒲為分直闇投誠素庶必能玄

了脫悠爾來儀想時加資遣也

漢魏六朝百三家集卷七十三



欽定四庫全書

漢魏六朝百三家集卷七十四

蕭子良集

目錄

序

淨住子序

淨住子淨行法門

三十一條

七

賓僚七要

詩

九日侍宴

侍皇太子釋奠宴

遊後園

行宅

登山望雷居士精舍同沈右衛過劉先生墓下

作

漢魏六朝百三家集卷七十四目錄

欽定四庫全書

漢魏六朝百三家集卷七十四

明 張溥 輯

蕭子良集

序

淨住子序

遺教經云波羅提木叉是汝大師若住於世無異我也  
又云波羅提木叉住則我法住波羅提木叉滅則我法

滅是故衆僧於望海再說禁戒謂之布薩外國云布薩  
此云淨住亦名長養亦名增進所謂淨住身口意身繫  
意如戒而住故曰淨住子者紹繼為義以沙門淨身口  
七支不起諸惡長養增進菩提善根如是修習成佛無  
差則能紹續三世佛種是佛之子故云淨住子

淨住子淨行法門

皇覺辨德門一

九十六種道而佛道為最上勝者非無其義夫立名所

以表德非德無以顯名有名未必具德有德名非虛唱  
是知名有真假德有虛實豈可道俗混同竊名假實而  
不辨析者乎今覩殊教異軌分衢舛迹未嘗不有其名  
而闕其德不無其稱而求其用是知有名無德者外道  
也有德無名者佛道也譬若濟海託舟踐途寄足故經  
云直心是道場無虛假故發行是道場能辦事故如是  
四弘六度俱稱道場藉如此之勝因獲若斯之妙果所  
以解脫去其累般若窮其照相好表其容法身顯其德

語其至仁則三念齊想言其自在則無畏獨步談其累  
功則十力為用仰其妙極則不共之法神通方便無量  
法門洞達三世了照萬有卓然明顯英聖超羣故號如  
來十號具足既自覺於生死昏夜又復起於未覺悟者  
斯可謂有其名德無不包具其美德無不備故知形端  
則影直聲調則響和未見貌醜鑒鏡有悅目之華體姪  
照水發溢羣之觀書云不登山無以知天之高不測水  
無以知地之厚也凡如斯之異學皆漏於佛之大道矣



故經云世間亦有常樂我淨出世亦有常樂我淨世間  
者有名無義出世者有名有義故六師結誓經問佛名  
德佛答云最正覺自得不染一切法一切智無畏自然  
無師保至獨無等倫自獲於正道如來天人尊一切智  
無畏今各既知至德有歸邪正異趣善惡分運凡聖路  
隔幸得信因果悟非常順智流入正道諸聖竝能悼川  
上之不追悟交臂之潛往病生滅之無窮慕我淨之恒  
樂凡我咸已仰風餐化割愛辭榮豈得不慍然增到形

命相競者乎故當清和其性哀愍有形等心存濟以法  
惠施不犯不取有求不逆常志大乘內外相副是名具  
足清淨度門

開物歸信門二

如來愍念衆生愛同一子何嘗不以善權方便弘濟並  
之津乎所以垂形丈六表現靈儀隨方應感法身匪一  
及其金容託體相好莊嚴顯發衆生欣樂瞻覩行則大  
千震動衆魔懾伏住則洞達諸定外道歸化坐則演示

方等釋梵誥仰臥則開一實道三乘稟德言則三塗靜  
苦笑則四生受樂聞聲者證道見形者解脫當此之時  
豈不盛哉今者雖稟精靈昏惑障重進不覩分衛國城  
退不聞八音辯說將由罪業深厚煩惱固牢非唯恐不  
見前佛後佛來聖近賢深憂惡道無由可絕發如此意  
實有切情之悲運如是想不覺痛心之苦豈容順默使  
流晏安苦海沈淪沸火而不自拔者乎當須慷慨凜厲  
挫情折意生增上心懺悔滅罪去諸塵累乃可歸信自

不堅強其志忘身捨命捍勞忍苦銜悲惻愴者將恐煩  
惱熾火無由而滅無明重闇開了未期譬如牢獄重囚  
具嬰衆苦抱長枷牢大械帶金鉗負鐵鎖捶撲其軀膿  
瘡穢爛周遍形骸臭惡纏巾而欲以此狀求見國主貴  
臣雖復一心無怠懇誠嘉到恐升高殿踐王筵亦無由  
而果假令慙念欲覩為難何以故以其具諸罪惡不離  
苦具故若去枷脫鎖洗垢嚴服王不我礙自然而現今  
欲歸信亦復如斯將見如來相好光明者先當淨身口

意洗除心垢六塵愛染永滅不起十惡重障淨盡無餘  
業累既除表裏俱淨方可運明想於迦維標清心於寶  
刹去諸塵勞入歸信門必然仰觀法身無礙如囚脫枷  
鎖自然見於王我今除煩惱亦必觀諸佛若不如是雖  
復慙懃倍切直恐障礙難通豈可不五體投地如太山  
崩一心歸信無復疑想奉為至尊皇太子七廟聖靈龍  
神八部一切劇苦衆生敬禮十方一切三世諸佛求哀  
懺悔既悔之後常行柔軟調和心堪愛心不放逸心寂

滅心真正心不雜心無貪恡心勝心大心慈悲安樂心  
善歡喜心度一切心守護衆生心無我所心如來心發  
如是等廣勝妙心專求多聞修離欲定奉戒清淨念報  
恩德常懷悅豫不捨衆生

滌除三業門三

身口意三禍患之首故經云有身則苦生無身則苦滅  
既知其患苦則應挫而滅之滅苦之要莫過懺悔懺悔  
之法先當潔其心淨其慮端其形整其貌恭其身肅其

容內懷慚愧鄙恥外發書云禮無不敬教不可長又曰  
過而能改是謂無過經云於一切衆生敬之如親想各  
自省其過然後懺悔衆等從無始世界以來至於此生  
由於身意造諸苦業竝緣愚癡多違至教遂乃憍慢懈  
怠形用不恭眠坐放逸行動輕傲或入出僧坊登上堂  
殿禮拜旋遶形不卑恭或於父母師長上中下座善友  
知識前服用不端動止乖法非禮而觀用違體製或盜  
三寶財及親屬物一切他有抄掠強奪欺誑增減非分

相陵或姪佚恣縱非時非處罔隔禽獸不避親族或造  
五逆水火焚燒攻畧坑陷加毒無罪或剝削刦考掠  
斫射傷毀斬截殘害剥裂屠割炮燒煮炙燔淪諸如此  
罪或為姪欲或為財利或為慳貪或為癡我無慚賢愚  
不愧聖達今思此過若影隨形怖懼慚愧悲惻懺悔痛  
苦懺悔已有相加害者從今已去為真善友生生相向  
以法示誨願十方佛特加攝念悔身業障永更不造次  
懺口業此是患苦之門禍累之始書曰一言可以興邦



一言可以喪國又曰言行君子之樞機樞機一發榮辱之主經云不得離間惡口妄言綺語諂曲華詞構扇狡亂故知有言之患招報實重廣如自愛經彰斯業相又如經云失命因緣尚不妄語何況戲笑構扇是非常以直心懺悔口業次懺意業意為身口之本罪禍之門書云檢七情務九思思無邪動必正七情者喜怒哀懼憎愛惡欲者也九思者視思明聽思聰色思溫貌思恭言思忠事思敬疑思問忿思難見得思義此皆所以洗除

胸懷去邪務正經云不得貪欲瞋恚愚癡邪見故知萬惡川流事由心造何以知其然若瞽緣心起故口發惡言言由意顯便行重罪今欲緘其言而正其身者未若先挫其心而次折其意故經云制之一處無事不辦既心會於道身過不遏而止意順於理口失不防而滅然身口業麤易可抑絕意造細微難可罄盡廣如諸經說其相狀

修理六根門四

經云罪無定相隨因緣造既是因緣而生今亦隨因緣而滅前已懺其重惡則三業俱明又欲莊嚴容體則須六根清淨固知心之驅役諸識亦猶君之總策諸臣故書云君人者懷乎如朽索之御六馬言其畏敬御物不及於亡驗之此事曉然俱了但以萬境森然感發內外更相因倚構接心識故經云心王若正則六臣不邪須各慚愧制馭根識如法句經心意品說昔有道人河邊學道但念六塵曾無寧息龜從河出水狗將噉龜龜縮

頭尾四脚藏於甲中不能得便狗去復出便得入水道  
人因悟我不及龜放恣六情不知死至輪轉五道皆由  
意根故須聰明六根罪業我從無始已來眼根因緣隨  
逐諸色見勝美之事不能修學見不善之業隨順履行  
獲此雙眼其淨甚少惟見無慚無恥之色不見賢聖神  
通方便作用之色雖有雙目與盲不異是大可恥一也  
我從無始已來耳根因緣隨逐外聲聞說正善信忠勸  
矣不能修學反生憤結聞邪惡事歡然順行緣此因故

唯聞一切不善音聲不聞清淨正法之聲十方諸佛常  
說妙法我今不聞生聾不異是大可恥二也我從無始  
已來鼻根因緣若聞正教戒德妙香初不樂聞反生妨  
礙聞諸惡欲邪媚之香深心耽著由此業故墮大地獄  
生在邊地不聞賢聖五分之香不聞三乘四攝等香使  
我輪迴常與善隔是大可恥三也我從無始已來舌根  
因緣造過特多貪著厚味不淨說法致此罪緣常淪生  
死是大可恥四也我從無始已來身根因緣多造衆罪

自重輕他增長癡愛由此業故得下賤報於佛勝緣無由攀附是大可恥五也我從無始已來意根因緣備造衆惡至人經教拔苦出要心不希行更生違拒乃學異論規圖罪種致無正信求名求利增長我見乖僻尤重臨死之時方悔虛過此大可恥六也

生老病死門五

尋夫遠劫已來三業所纏六根所惑染愛潤業沈沒迄今生老病死實為大苦故經云一身死壞復受一身生

死無數盡天下草木斬以為籌計吾故身不能數矣所以達人興厭高升界繫之表愚夫貪生恒淪死生之獄故須識過可得長辭如胞胎經云衆生受胎冥冥漠漠狀若浮塵在胎十月四十二變識微苦毒楚痛難忍臭處迫迫劇於牢獄饑渴寒熱過於餓鬼母飽急塞母饑悶絕食冷如水食熱如火飲多如漂大海行急如墮險谷坐久如土鎮竿立久如懸厠屋下熏上壓無時大苦及將欲生倍復艱難如赤身受办叫聲震烈雖具此苦

復多不全若一日百日一月十月或在胞胎墮落或出生母子喪命當思此生實是大苦次思老苦經云年耆相熟形變色衰坐起苦極餘命無幾涅槃經云譬如燈炷唯賴膏油膏油既盡光炷非久人亦如是唯賴壯膏壯膏既盡衰老之炷何得久住又如折軸無所復用如遭霜花人不欲視又經云是日已過命亦隨滅如少水魚斯有何樂當思此老復為大苦次思病苦皆由風寒冷熱食飲不節四時變改則水石乖扶況此假合之體



危脆之形望免四大不虧百一無惱豈可得也及至苦  
患切身心煩愁塞求生不差求死不絕痛楚百端窮憂  
自結屎尿臭處妻子為之改容形體不攝傍人為之變  
色況單身寄病誰肯提攜故經云慈父孝子至病死時  
不能相救此至言也實為大苦次思死苦經云死者盡  
也氣絕神逝形體蕭索人物一統無生不終又經云去  
處懸遠而無伴侶無所破壞見者愁毒等經又云獨生  
獨死身自當之幽冥幽冥會見無期是以聖人以身為

患豈復以死更受生乎往來無道勞我精神誓斷貪源  
絕其生本是故死苦實由此身如來出家立言此意

剋責身心門六

身為苦本自所造集於生死中復增惡業不能改悔隨  
順佛語是故特須深自剋責經云見人之過口不得言  
已身有惡則應發露書云聞人之過如聞父母之名耳  
可得聞口不得言又云君子顯其過經云讚人之善不  
言已美書云君子揚人之美不伐其善書云恕已可為

譬勿殺勿行杖書云已所不欲勿施於人今以經書交映內外之教其本均同正是音殊名異若使理乖義越者則不容有此同致所以稱內外者本非行分但以心表為言也經云佛為衆生說法斷除闇惑猶如良醫隨病授藥書云天道無親唯仁是與若出家之人觀空無常厭離生死行出世法是則為內乖此為外在家之人歸崇三寶持戒修善奉行禮義是則為內乖此為外今內外道俗共知內美之稱由心外惡之名在行豈得不

捨外惡勤修內善若欲修行先自尅責當知求進是假  
名退檢是實名欲涉千里者必裹糧衛足而致也欲升  
彼岸者必聚智糧具戒足而登也所以能果者實由退  
檢覺察校試輕重故能却斷無明退截老死愚闇滅則  
慧光發四相遷則戒德顯故知廉退者進之兆也貪求  
者退之萌也夫求而獲者虛則實愛情深故有傾危墮  
墜之苦此外道之法也退而獲者實則意無深戀故得  
常安涅槃之樂斯佛道之法也今者但應退檢不及以

自責躬若志求進必損我傷物退檢失則彼我兼利當  
知尅責心口是入正之路檢察身行是解脫之蹤是故  
如上善自尅責則無善而不歸也

檢覆三業門七

尅責之情猶昧審的之旨未彰故以事檢心按所修習  
既知不及彌增悚慙何謂檢按檢我此身從旦至中從  
中至暮從暮至夜從夜至曉乃至一時一刻一念一項  
有幾心幾行幾善幾惡幾心欲摧滅煩惱幾心欲降伏

魔怨幾心念三寶四諦幾心念苦空無常幾心念報父  
母恩慈幾心願代衆生受苦幾心發念菩薩道業幾心  
欲布施持戒幾心欲忍辱精進幾心欲禪寂顯慧幾心  
欲慈濟五道幾心欲勸勵行所難行幾心欲超求辨所  
難辨幾心欲忍苦建立佛法幾心欲作佛化度羣生上  
已檢心次復檢口如上時刻從旦已來已得演說幾句  
深義已得披讀幾卷經典已得理誦幾許文字已得幾  
過歎佛功德已得幾過稱菩薩行已得幾過稱讚隨喜

已得幾過迴向發願次復檢身如上時刻已得幾過屈身禮佛幾拜已得幾過屈身禮法禮僧已得幾過執勞掃塔塗地已得幾過燒香散華然燈已得幾過拂除塵垢正列供具已得幾過懸幡表刹合掌供養已得幾過遶佛恭敬幾十百帀如是檢察會理甚少違道極多白淨之業裁不足言煩惱重障森然滿目闇礙轉積解脫何由如上檢察自救無功何有時間議人善惡故須三業自相訓責知我所作幾善幾惡

訶詰四大門八

上已檢按所行多諸廢情由此四大勿致懈怠是故訶  
詰令其覺悟夫三界遐曠六道繁滋莫不依因四大相  
資成體聚則為身散則歸空然風火性殊地水質異各  
稱其分皆欲求適求適非一所以乖忤易動故一大不  
調四大俱疾乍增乍損痾疹續生風輕而地重水冷而  
火熱互相煎惱無時得安經喻四蛇信哉可患又此四  
大無慚無恥無恩無義我今恐其不安所以資給所須



然彼四大初無感愧何以知之至如悲風霜殞嚴冬雪  
零便須綿纈衣裘臥褥溫室若季夏鬱蒸熯赫炎烈復  
須輕絺廣室風扇牙簟春秋改節氣候清爽復須輕軟  
服御乃至食則甘肥珍餚充滿飲則瓜果溫漿冷水隨  
時資給安苦求樂此皆四大所須而我供贍未曾拒逆  
而此四大求索無慚不知有無有則充給不厭無則恐  
迫令得如飢須食不可暫闕脫致乖違內愁外戰增發  
火大不知我艱辛不怨我空乏唯欲貪求無有休息是

名無慚云何無恥汝之所須無窮我隨給汝不少雖然  
當受初無愧容我既役智盡謀以相資贍而汝初無矜  
念於我於少日中不須衣食云何無恩今既得我如此  
供給未嘗為我造作善事獲我衣食飽暖怡懌反更思  
念作一切惡少時禪誦禮拜即生懈怠云何無義此四  
大身不可期懷不可委信我今為汝種種供須反復橫  
起種種愛著驅逼於我行殺盜姪我既愚癡不能制革  
還相隨順生諸疾病或遭王法牢獄鞭杖為汝所招我

既嬰苦汝亦無利猶復不知更求更索從今日去不復  
隨汝流轉老病生死大海汝當隨我行道作諸善業方  
可給汝隨病衣食趣得支身以除飢渴汝當善自驅策  
令我蚤得五分法身常化遊行自在無礙

出家順善門九

上已檢校所行知乖道實遠尅責自咎則進趣有途前  
雖道俗總論混知其過然在家罪重出家罪輕但出家  
之人行業階差生熟難辨然阡陌而觀亦麓見其迹今

出家者未登聖境而期望之人恒引聖責凡良由大教  
勝遠尊之者責重法律精微信之者望深何以知然今  
欲見雅形妙相之體當覩儀容端麗之人欲觀仁義盛  
德之風當尋有禮有義之行何常見衆多之口競譏棄  
諸外道正以不足及言所以息議在於衆僧動為論端  
實由我法清勝嫉之者多我法高遠毀之者衆書云城  
高則衝生道尊則魔盛今乍聞詰誚之言乃足驚怪就  
理而尋非無義而發試為檢其所修比其所習福之深

濃罪之厚薄可加意察之夫父母是孝戀難遣而能辭  
親妻子恩染難奪而能割愛勢位物情所競而能棄榮  
飢苦是人所難忍而能節食滋味是人所貪嗜而甘厭  
蔬澀翹勤是人所厭怠而能精苦七珍是人所恡惜而  
能捨離錢帛是人所蓄聚而能棄散奴僮是人所資侍  
而自給不使五色是人所欣覩而棄之不顧八音是人  
所競聞而絕之不聽飾玩細滑人所保著而能精粗無  
礙安身養體人所共同而能忘形捨命眠臥是人所不

免而晝夜不寢為業恣口朋遊人所恒習而處靜自檢  
白衣飲饌不知紀極而進食如毒白衣日夜無所不甘  
而已限以晷刻虛腹白衣則華屋婉偶而已塚間離著  
又行住坐臥如是法禮拜圍遶如是法讀誦講說如是  
法食飲便利如是法受供行施如是法修道習行如是  
法畧說如上無非有法數則三千威儀廣則說不可盡  
餘如出家功德經說

在家從惡門十

俗士每言談之次或問白衣歸向何法無不荅云釋氏  
純臣縱復實心錯背亦羞言其乖各所以爾者實由大  
法精勝不欲與善相違故也既言其信當事與言同若  
言事相反者便是矯偽諛諂側佞邪媚天下所驚嗟四  
海所駭歎若欲真實期於三世者見沙門之過當知凡  
劣形服雖異喜怒何殊便思其理可崇本不在人何得  
以鄙恡之行用廢大道乎且其積習勝業已積熙連沙  
喻可不深思今諸士女試自檢察實自多過瞋恚不避

尊貴惡罵無復高卑貪求不計毀辱慳慳不知禮節姪  
欲不擇禽獸黜退不避親族加以憍慢放逸貢高懟恨  
諍訟邪命詐現異相以利求利惡求多求無有恭敬不  
隨教誨身見有見及以無見未嘗省退以禮自制一何  
苦哉唯恐我不勝人人莫及我經說起慢此業熾盛燒  
滅宿世所種善根又云為惡雖少後苦無邊如毒在身  
終為重患諸俗人等唯欲營生不知顧死然生不可保  
死必奄至尋此危命非朝則夕俄頃之間兇變無常如



佛為愚癡富老公說偈汲汲憂子財非我何所有愚人  
多預慮莫知當來變廣文如彼何得不思貪求積聚終  
必散失身死名滅唯業相隨又觀女人所起患毒倍於  
男子經云女人甚深惡難與為因緣恩愛一縛著牽人  
入罪門女人有何好但是諸不淨何不審諦觀為此發  
狂亂郁伽長者經云在家修道當觀女人生厭離想非  
常久想不淨深想臭穢惡想羅刹惡鬼恒噉人想貪色  
難飽無止足想惡知識妨淨行想三惡道增憂苦不斷

目面脣口惑人之具人為所惑破家滅國殺親害子衆禍之本皆由女色

沈冥地獄門十一

萬法雖差功用不一至於明昧相形唯善惡二途而已語善則人天勝果差別於目驗述惡則三途劇苦皎然而非虛而愚惑之夫好起疑異多言人天是妄造地獄非實說以不覩故便不知推因以測果由不了故復不知驗果以尋因既因果未分空扇是非疑途亂起明在

何日無論未來其事難了但以即今善惡是驗冥漠非  
妄夫有形則影見有聲則響應未見形存而影滅聲續  
而響乖故知善惡相資亦復如是幸各明信無厝疑心  
何謂地獄經中廣說此洲地下八大地獄最下阿鼻四  
萬由旬鐵城四周表裏火徹銅狗黑虵哮吼嚼咋甚可  
怖畏諸小獄者散在鐵圍山間海渚空野衆處備受寒  
熱難可具說獄各有主牛頭阿傍其性殘虐無一慈忍  
見受苦者唯憂不苦唯憂不毒或問獄卒衆生受苦甚

可憐愍而汝無慈常懷毒害獄卒荅曰諸受苦者由是  
不孝父母謗佛法僧罵辱親疎毀陷一切破壞和合瞋  
恚殺害貪姪欺詐邪命邪求及以邪見憍慢懈怠放逸  
怨恨迷沒聲色耽著酒食犯所受戒不知慚愧具足惡  
業來此受苦受苦既畢恒加諫喻此是惡處今已得脫  
勿復重來然此衆生初無改悔今日得出俄頃復來勞  
我形力如毒於彼今觀此輩既不修善往趣泥洹則是  
無知不識避苦所以倍痛苦之何由得生慈忍又經云

有十惡業殺生偷盜能令衆生墮於地獄畜生餓鬼無  
量劫數乃得為人還受短命貧窮等報又感外報棘刺  
沙礫水草少味不如意等且身口意此三發業之始自  
作教人見作隨喜此三成業之由現報生報後報此三  
感業之所故論云三三合九種從三煩惱生然前九位  
業通善惡受三塗報唯在三毒是故行人先須觀彼於  
此人身可有出理

出家懷道門十二

自大聖已還性體未圓三相所遷四山作固所以如來  
智周域外尚假苦切之言令諸有生得入律行今居在  
凡愚善惡雜糅何能免點累之愆愛染之失若聞所說  
當深歎悼何時免離若斯之過不得內懷驚疑增其忿  
憾也然則起忿之來誠由著我如經所說執我見者生  
死大患第一破戒且舉一我無人不患自非正聚誰不  
弊之出家本意為滅此惑故諸行者常須遮制積功不  
已漸得出有迷此不修還同無始徒在僧倫更招苦業

今聞出家之美不得便言無惡又聞俗人之惡不可便  
言無善故通述之宜各警策夫出家者猶信故入道也  
當去愛著順佛語則出世之行成也若於行有虧則非  
謂之信也內既無信則翦落衲衣瓶鉢等於身無用畧  
引數條不得自怠已去憤鬧得空間已離俗愛無攀緣  
已出馳動入寂定已離染著得無礙已捨苦境得無惱  
已離妻子無纏縛已棄飾好厭華侈已絕聲色滅貪求  
已斷榮辱去我見已向八正趣道門已披弘誓恐辱鎧

已服解脫涅槃衣已望畢竟空寂舍已登慈悲喜捨堂  
已見迴向之大利已聽多聞自覺音佛見出家之利樂  
如此所以勸獎誠勵修學故經云蓋聞沙門之為道也  
捨家妻子捐棄愛欲斷絕六情守戒無為其清淨一心  
也則萬邪滅矣一心之道者聲色不能汙榮位不能動  
免離憂苦存亡自在塊然獨立捨五慳除兩穢二堅縛  
二障法二種垢二雨雹二癰瘡二燒法二種病四破戒  
者一謂三業不淨二謂聞空怖畏三謂不為泥洹四謂



貪著我見又如經說菩薩修行先除四失謂捨欺誑重  
報恩決嫌疑滅諂心如是備行諸度妙行清淨廣大安  
住寂靜

在家懷善門十三

前已聞其惡深自鄙悼今顯其善悅以進道何以知之  
自非貪欲情厚染愛性深富貴意重勢利心濃者則不  
容安處累縛黑闇所纏故知在家者衆患之本矣故使  
室家妻子宗親眷屬周旋來往朋友遊處奉上接下皆

須將意意不獨往其應筐篚筐篚之用非求不至既馳  
求事廣財念無窮惟念多蓄不顧無常擁積腐壞靡知  
分散是為欲不慳貪便不能得既不屬纏繞百心不同  
不加鞭罰則為惡者衆雖曰止惡要由意瞋起是為欲不  
瞋恚亦不能得為此資生按計馳求萬方以利縈心不  
知患害水火盜賊艱苦備經或夭身命殘殺無辜宴集  
歡樂非此不濟起貪癡心謂我加爾飲噉之後暢快莫  
思是為欲不起癡而不能得當知白衣與善相違故曰

所作之事與地獄對門又曰居處如牢獄妻子如枷鎖財物如重擔親戚如怨家而今在窮苦之地繫縛憂厄艱辛纏累備諸苦惱不親三寶不近正法窮迷闇障劇苦之內而能一日一夜守持清禁六時行道兼修六齋或持一戒二戒三戒乃至五戒八戒十戒菜蔬節味檢身口意又率妻子內外眷屬迴向崇善建菩提因或撒父母之供妻子之分財貨衣服甘珍餽果窮其所有敬供精潔合室營奉晨昏翹注或為疾病患危急縣官牢

獄或親族崩亡祈福魂路或生善滅罪始發信心崇仰  
沙門在聖無別由其隨順佛正教故所以順佛語故出  
離生死若違佛語必墮惡道是故常應堅發正願願受  
化生自在飛行一切佛刹隨所感見應接羣生學佛威  
儀入如來室著如來衣坐如來座巧便大悲開悟解脫  
於諸法中究竟無障盡處空際大誓莊嚴

三界內苦門十四

夫三界牢獄四圍輪轉在家出家未斷我倒無得免者

既為生死所纏身心勞累遷變無窮無非是苦故經云  
三界皆苦何可樂者而衆生常惑謂言世間是常是樂  
出世樂因無常是苦何其沈迷頓此顛倒纔驗刺身即  
覺苦受何得云樂畧引數條證知唯苦若謂飲食為樂  
者則應多所餐進身和心悅何意小乖分度便成疹患  
若謂衣服為樂者則應春夏一服愛心無厭何意寒暑  
異服明不甘樂所以苦本若謂室宇為樂者何意不常  
一處既致馳動明知避苦若謂妻子眷屬為樂者則應

長相歌笑何意俄爾無常悲號哽噎當知眷屬實是苦  
本若謂妙色以為樂者則應長悅心目永慰形骸何意  
須臾顏貌變改髮白面黑傷痛少年華美之艷故知此  
色本自是苦不是外來若謂好聲以為樂者則應絲竹  
繁會親聽無厭何意小久便致疲倦耳不樂聞當知是  
苦若謂酣酒以為樂者則應適意遣憂長無惱患何故  
神昏心悶骨節慘痛或因此事鞭杖鎖繫喪身夭命破  
家亡國受苦無量若謂朋遊為樂者則應終日遊散不

知厭極何意每一登臨少時便倦後更相攜無復行意  
若謂姪佚為樂者則應血氣剛強眼明神爽少而不老  
壯而不變何意悲情逞欲輒有疲困抽腦徹髓頭眩眼  
亂心驚氣迫筋骨緩縱口燥脣焦四肢振掉抽拔五藏  
由此天命當知姪佚實是苦本若謂榮位為樂者則應  
始終不變無恥無辱何意黜陟之間憔悴立至已上諸  
條大舉而言然此六塵五情遊心之處無非是苦所以  
大聖覺察三界牢獄知苦不迷解脫生死

出三界外樂門十五

佛世尊說三界世間總是苦聚非唯一苦而已又是無常無我不淨終歸於空出世之外則有常樂我淨具八自在而衆生長迷妄謂為樂一何可悲且說一苦隨相有八何謂八苦所謂生苦老苦病苦死苦愛別離苦怨憎會苦求不得苦五盛陰苦於一苦中更有諸苦故諸行人策勵行道節身口意翹勤匪懈羣小無知謂之為苦大聖圓照三達洞了知此小苦大樂正因雖有勞頓



所期者大非謂為苦故引諸行相用簡有心若捨身命  
憐愍衆生得佛金色身光明洞徹行住坐臥震動大千  
相若禮拜父母師長賢聖得佛頂相高明若不誑衆生  
讚揚其德得佛眉間毫相若行慈愛仁救衆生得佛紺  
青螺髮相若以光燈供養施人得佛頂出日光相若以  
慈意視衆生者得佛淨目上下眴相若絕滋味十善化  
人得佛四十齒齊密相若說慈善志意堅強得佛四牙  
白淨相若絕口四過得佛方頰車廣長舌相若行施平

等得佛果時七處合滿相若忍苦行決定無亂得佛師  
子臆相若行正淨醫藥救人得佛身方正相若行慈仁  
不杖衆生得佛修臂指長相若視地行不踐蟲命得佛  
行不蹈地相若手扶接有苦衆生得佛手內外握相若  
行四攝攝取衆生得佛手足網相若以淨心供養善人  
得佛手足輪千輻理相若施衣服隱過蔽惡得佛陰馬  
藏相若說除患死法得佛鹿膺腸相若善莊嚴不解衆  
生肢節得佛鈎鎖骨相若柔和順塔右遶從人得佛右

旋毛相若平治道去棘刺得佛一孔一毛相若不服華  
綺沐浴於人得佛皮膚細軟相若掃塔除穢得佛身不  
受塵相若修萬行常願具足得佛胸卅字相若捨國城  
妻子得佛淨土眷屬賢聖相若自節食上味施人得佛  
上味相若常讀誦不惡口加人得佛總持口香氣相若  
說法引接衆生得佛面無飢渴滿口光辯才相若持戒  
無缺得佛法身圓備相若在山間頭陀苦行得佛塵累  
都盡相若捨華堂幽林禪思衆生謂苦不能行之菩薩

志意堅強所期者大不以為苦故得自然宮殿七寶房舍早得成佛衆生猶自流轉生死海中豈非為顛倒惑纏之所致也故當勤加精進修行此行便出三界

斷絕疑惑門十六

夫因果感應影響相生必然之道理無差舛而衆生業行不純善惡迭用以不純故報有精麤或貴或賤或美或惡其事迹匪一不了本行故致疑惑何者如精進奉戒應得長生子孫熾盛親族榮顯而返見身命夭促門

族衰殄屠害之人應嬰促壽眷屬殘滅而反延年壽考  
宗強援廣清廉之行應招富足而見貧苦貪盜之人應  
見困窘而覩豐饒此乃緣其福故現世輕受如金剛般  
若云由持經故為人輕賤是人先世罪業應墮惡道以  
今輕賤故先世罪滅所以致有此疑者由其無明惑故  
妄起顛倒不能解了三世業相今畧出數條世人惑事  
用以懲誠庶有識者識以除疑智人以生為苦所以不  
忍愚夫貪生以生為樂是一惑也智人以不生則不死

故云涅槃寂滅之樂而愚夫惡死不知遠死之方是二  
惑也智人以居家為苦譬之牢獄書云割情在於驕奢  
而愚夫染著以為榮樂是三惑也智人知妻子之累故  
比之枷鎖書云割情在於所愛而愚夫以恩愛為懽欣  
是四惑也智人以眷屬是繫縛之本放之如讐而愚夫  
繫戀以為勝適是五惑也智人以榮利是自滅之筌書  
云割情在於速達而愚夫不計讒害取貴是六惑也智  
人以色聲香味為苦本書云割情在於嗜欲而愚夫為

之沈溺迷醉且列如前不容致惑是以智人當勤自勉  
自生老病死不離其身勿生疑惑一生空過今更出之  
以顯疑相見布施者疾患早亡便起疑心慳吝見持戒  
人過中不食致患懷疑自養見恣辱人檢心攝形致患  
懷惱勸令開意見誦經人旦夕緣理致患勸息見菜蔬  
人致患瘦弱勸噉肥美見坐禪者致患勸臥聞語引進  
便稱本情懈怠自恣隨順流俗曾不思量朝聞夕死如  
救頭然何有情賴更習常俗以死自誓方曰有志

十種慚愧門十七

既已同知在家男女之惡人見出家僧尼瑕累又聞疑惑顛倒之門退自思省實可慚愧經云慚愧得具足能滅閻障故又云慚如鐵鉤能制人非法若無慚愧與諸禽獸無相異也涅槃經云有二白法能救衆生一慚二愧慚者自不作惡愧者不教他作慚者內自羞恥愧者發露向人有慚愧故則能恭敬父母師長懷慚愧故罪則除滅顯相如此各須慚愧順清白法事乃無量畧舉



十條以為綱要第一慚愧諸佛如來往昔欲令我等離苦獲安所以發心行菩提道忍苦受辱令成法身常以正法為我解說而我不能如說修行第二慚愧父母哀哀父母生我劬勞長養教詔常懷憂惕既為人子不順誨約反學凶強陵蔑貴賤既乖諍子上失令名深為可愧第三慚愧諸子然彼實能晨昏定省色養無虧而終貧煎無物賑給故使諸子無由得立又闕教導使子愚昏實為可愧第四慚愧師僧然我父母生育訓誨不能

使我出生死海今此師僧教我出家受增上戒懷羅漢  
胎得羅漢果而我違犯深為可愧第五慚愧弟子既能  
晨夕依教策修而反固遮有違聖說致使道業寸尺無  
功一生空過無法制奉顧斯負累亦可深愧第六慚愧  
帝王恒以十善化導天下故國土安寧五穀豐熟所以  
百姓安家復業出家之人泰然安樂任其禪誦而今懈  
怠深是可愧第七慚愧檀越出家所懷解脫為本形骸  
資待衣食為先所以諸俗為道興福供給資緣故隆正

業而惑不全失於敬重亦可深愧第八慚愧良友知識  
化導見佛因緣令具梵行大經唱示而我聞諫反以為  
讐背逆三歸禮向神俗迷著善導故違正誨深可為愧  
第九慚愧所化諸人由我無德久不種緣致使開悟莫  
能津濟故令聽者徒枉功夫縱聞雜善不獲純淨內心  
自疾深可慚愧第十慚愧天龍神鬼護法冥祇我本發  
心誓度一切故諸天龍擁護無惱而我愆缺情志不恒  
唯知負恩但增慚愧

極大慚愧門十八

慚愧之義以不及為本若於正行悉能遵奉則無假慚愧書云內省不疚何憂何懼又曰心苟無瑕何恤無家今既理妙難精觸向乖背一念之間造過無量過無量故慚愧亦應無量前已畧舉大致其中枝派不可縷悉更立此門使尋文求旨知理無不攝也夫衆生以我見故不能推美於物引惡在已而於萬善不能修習見人勝行意欲陵之無慚之甚何得不見今列位顯之庶可

斂迹若見直心行慚愧人我不能行願彼不作見行布施持戒人開解脫門願其早止見行惡辱精進人自不能行願早退沒見多聞修定者自不能行不欲使作見行慈悲喜捨者不能讚免欲其不行見菜蔬一食者自不行故勸令退敗見行伏心人應慚愧法乃勸不行乖八正道見學問誦經人自無此行不使彼作見圍遶禮拜者自懶惰故嫉令不行見有唱導梵音者自不及彼願不為之見經行頭陀者既不能行反謗毀滅今據叔

世設法開化以此為高義當生信滅罪祈福弘道而今  
登無畏座開廣笑謔之端飾詞自麗之美高言興色誹  
誚往還儀容傲很初無謙遜永不退省我解未深唯詰  
誥者尋經有謬故經云若為利養名譽我心愛黨而說  
法者是名非說若利於彼增信心故滅煩惱故起淨業  
故知慚知愧開八正路是名善說如過去世有苦岸比  
丘說有衆生我人壽命違於佛語命終入阿鼻地獄仰  
臥伏臥左右脇臥各九百萬億歲爾後更歷諸餘地獄

自外徒黨受苦難言故知不依佛教毀謗正法其罪實重當知法師實亦為難其善則致福無量其惡則獲罪亦重是故法師應須極大慚愧然居在世間養生之急在於衣食由此衣食勞亂極深所須繒纈皮革無不損生殘命著他皮肉還養肉身乃至食噉一粒之食非用功夫無由入口推度前功商量我腹上入下出常流不止而於其中選擇精肥進納軟滑貪嗜美味無羞無恥須臾變改臭不可近將行將坐如廁不殊何有智者於

食生貪若生貪者大須慚愧與彼畜獸復何取別

善友勸獎門十九

夫能了除疑惑內發慚愧勸獎之功善知識也今欲修習萬行非善知識無由進道經云如栴檀葉在伊羅林其葉則臭伊羅臭葉在栴檀林其葉則香書云與善人居如入蘭芷之室久而偕芳與惡人居如在鮑魚之肆與之俱臭又云近墨必緇近朱必赤故知善友能作佛事是大因緣是同梵行善知識者今能將我得升淨土



惡知識者今能陷我墜於地獄當知善思不可酬報夫  
善惡之理皎然明白但以任情適道則進趣之理遲善  
友勸獎便勇猛之心疾經有獎課之文書有勸學之說  
當知要行實由勸成故經云菩薩自身布施亦勸他人  
令行布施自行持戒忍辱精進一智慧亦勸他人令  
行此事然則勝美之事欣樂羨仰物之恒情今若徒有  
願樂之心不行願樂之事未見其果猶若絕糧思味其  
於飢渴終無濟益故畧引數條盛行要事以相警誡今

有財富室溫家給人足不勞營覓自然而至復有貧苦  
飢弊形骸勞悴終日願於富饒而富饒未嘗暫有以此  
苦故勸其布施力厲修福若有衣裘服翫鮮華充備又  
有尺布不全垢膩臭雜是以勸獎令施衣服及以室宇  
若見百味珍羞連几重案又有藜藿不充困於水菜所  
以勸獎令施飲食若見榮位通顯乘肥衣輕適意自在  
復有卑陋猥賤人不齒錄塗炭溝渠坐臥糞穢此苦可  
厭勸令修福除滅憍慢奉行謙敬豈可他人常貴我常

在賤若見形貌端正吐言廣利又有面狀矬陋所言險  
暴此苦可捨勸令忍辱若見意力强幹少病登勞行道  
無礙有人多患不安所行莫濟見有此苦勸施醫藥令  
其進趣故法句經云四時行道得度衆苦一者少年有  
力勢時二者有財物時三者遇三寶福田時四者當計  
萬物必離散時常行此四必得道跡應自督課不待他  
勸

戒法攝生門二十

前已勸獎於他我今自加課勵凡論課勵要必託境行  
因若心志浮蕩則進趣無寄然託境行因戒為其始可  
謂入聖之初門出俗之正路如乖此訓永處三塗人天  
長絕是以經云譬如大地長生萬物戒亦如是能生衆  
生人天華果故經云若無此戒諸善功德皆不得生良  
以三塗苦報罪障所纏人天勝果堪為道器欲感勝果  
非戒不生是以聖人先明此教然三歸五品戒法兩科  
七衆小學要以三歸為宗一乘大教必崇三聚為本竝

如經律具顯規猷卓爾憲章行業明逾鑒鏡今粗舉其大致用光恒俗所以發戒之原須依三寶者蓋由佛法僧寶天人所尊歸依生信必能出有若歸邪神反增苦趣故經說云歸佛清信士不歸諸天神故須先定邪正方識逆順經云信為道元功德之母智是解脫出有之因誠至言也若無此信心志浮虛歸戒不得是以發足立信為先何謂三歸謂佛法僧此三可重故名為寶何謂為佛自覺覺彼無師大智五分法身也何謂為法能

軌能正滅諦涅槃清淨無相也何謂為僧能和和衆無學功德自他滅處也何謂為歸可憑可向也何謂為寶能招利樂正心依仗近獲人天遠登無學此則三寶區別之門若論極教理唯一統照無不周照周等覺謂之佛寶禮無非法謂之法寶至德常和謂之僧寶此乃體一義三同性三寶衆生解悟信知佛性離此生死招興利樂是故一切無不歸憑第一翻邪三歸第二五戒三歸第三八戒三歸第四十戒第五具戒第六十善戒第

七大菩薩戒此之七戒所防過境近約大千世界之內一切六根六大竝是戒境廣如常說

自慶畢故止新門二十一

從前發心已來知至德可歸檢校剋責滅諸惡門疑惑既遣慚愧續修勸獎兼行戒德又顯得捨如是之罪障餐聽若斯之勝法豈得不踊躍歡喜差并自慶者乎經云八難難度一地獄難二餓鬼難三畜生難四邊地難五長壽夭難六雖得人身盲聾瘡癰不能聽受難七雖

得人身六情完具而世智辯聰信邪倒見不信三寶肆  
意輕侮此身死已便在三途隨業沈沒久乃得出時在  
人道還不正信家生第八前後佛間不覩正法徒生一  
世增長邪見具造衆罪尋爾徒死是故經云徒生徒死  
甚可憐愍奉法行人先崇此意生死大事不可自寬今  
畧出自慶數條繫在心首佛言地獄難免而今同得免  
離此苦一自慶也佛言餓鬼難免而今同得遠於此苦  
二自慶也佛言畜生難捨而今同得不樹此因三自慶



也佛言生在邊地不知仁義今在中國修習禮智四自  
慶也佛言生長壽夭不知植福福盡命終還墮惡道而  
今不以世樂自娛迴以供養五自慶也佛言人身難得  
一失不返有過盲龜浮水之譬今得人身六自慶也佛  
言六根難具今無缺損七自慶也佛言丈夫男身難得  
我已得也佛言女人身者須知佛性則是丈夫我已知  
也佛言邪辯難捨我今歸正法也佛言佛前佛後是為  
大難我今相與慷慨立志既見色像又聞正法則同鹿

野滅惑不殊也佛言見佛為難我今頂禮佛所記像功用等倫也佛言聞法為難我今備得聞也佛言出家為難我今具隨衆也佛言出家專信倍復為難我今一心無敢二見敬法愛法以法為師經中偈言惟念過去世供養為輕微蒙報歷遐劫餘福值天師淨慧斷生死癡愛銷無遺佛恩流無窮是故重自歸

大慈惡對門二十二

夫道從苦生不由樂果德憑功建非情所集故經云恐

辱第一道於諸衆生心無礙故以其在苦則多礙多惱  
起不善業今所以得無礙者良由在礙而修無礙故礙  
而不為礙既於礙而無所礙豈非忍力之所致乎經云  
娑婆世界五濁之剎五痛五燒具諸惡報是故發大乘  
者多來此土以救苦為資糧以拔惱為要行此土一日  
修善勝於他方淨國百千萬劫所以爾者良由極苦之  
地心不及善而能於劇苦之中卓然發意忍苦受辱豈  
不奇哉所謂火中生蓮華此實為其有他方淨土無修

福地所以不及此土何者淨國七財豐溢不假布施攝  
貧窮也淨國律儀圓淨不假持戒攝毀禁也淨國則無  
辱無惡穢土無事非辱在辱能惡勝他方也淨國精進  
如救頭然不假翹勤攝懈怠也淨國之人入法流水念  
念修順無出入觀不假寂定攝亂意也淨國智慧明滿  
不假才巧說攝愚癡也又淨國之人非無弘誓但弘誓  
之功不及淨土四攝四等例同無用淨國樂故則救苦  
之心薄惡土苦故則進善之心猛故經云行於非道通

達佛道也夫欲發廣大心行菩薩行自非履危涉險備  
受艱難蹈熾火歷冰霜嬰苦切甘楚毒於萬苦中而能  
忍受者則道場可踐若無此惱恐何從生藉此煩惱起  
我諸善所謂塵勞之儔為如來種當知恐者有力大人  
功德之本所謂恐痛癢恐思想恐疾病恐飢苦恐疲勞  
恐寒暑恐憂悲恐熱惱恐惡罵無恥辱恐撻打無恚礙  
恐貪欲無愛著恐憍慢無背道恐所難恐恐所難行恐  
所難作恐所難辦能行此者真可謂大恐辱矣

緣境無礙門二十三

經云在俗則謂之為縛在道則謂之為解解即無礙所致縛即資待所招今若欲有待於無待則有待更煩無待於無待則有待自遣有待既遣則無礙之門可入若志在於資養便覩縛纏更重但衆生凡類觸向多阻不資於物則自濟無方資於物者累之重也生累纏繞解脫何由今既深知其累累實為苦何以知之今欲陸行非車舉人馬不動一累礙也今欲水遊非舟航不移二

累礙也今欲養身非衣裘屋宅則無所憑託三累礙也  
今欲養命非粳糧黍粟五味柔軟則無所資待四累礙  
也今欲修習一慧髣像無向五累礙也今欲求見一佛  
及一淨土發奇特心冥漠不見六累礙也今欲徹視十  
方障礙滿目七累礙也今欲求佛聖智以除障惑近是  
衆生心行而我不覩八累礙也今欲披文尋義雖課心  
力近在淺言不達意旨九累礙也今欲誦習經典受已  
忘漏十累礙也凡此累礙其事無量聖人所無礙自在

者由何而致實由遠諸塵勞自策為本是所資待莫不勤役自辦不假於他而他為我用所謂讓而得者則其理通求而獲者則其理滯菩薩不求自利但欲利益衆生是以其利在已而得無礙衆生常利我忘彼所以恒縛而無解聖是可求而得非是永隔無津今若欲學聖捨凡者當遵聖人所習雖其途無量然津濟要趣唯一解脫耳故經云若自無縛欲解彼縛斯有是處今欲學菩薩道必須棄凡夫縛凡夫縛者唯願得五欲縱意自



在實大縛也菩薩行人棄之不顧經云不得畜養奴婢  
畜生當自翹勤出離生死若假於他他還縛我無解脫  
期今云無奴不立無婢不辦此乃氣力强梁之時一旦  
臥牀百事同棄自救不暇何憂及人宜自勉勵則解脫  
之門易可登耳

一志努力門二十四

初從辨德極於無礙善惡二途凡聖苦樂明了審諦斯  
言備矣唯應努力勤而行之經云感傷世間貪意長流

沒於愛欲之海吾獨欲反其源故自勉而特出是以世  
世勤苦不以為勞經云我與阿難空王佛所共發菩提  
心我常勤精進所以速成正覺又云得正法智已以無  
疲厭心為衆生說斯可謂努力矣夫衆生流轉三有觸  
苦相纏所以情識闇弱慮淺多迷每一修善怯退惶擾  
念念之間百變乖舛自非勸之以努力獎之以剛幹則  
勇銳驍果之心不發經云衆生與無明怨賊鬪戰亦不  
異世間剋敵相禦世間則須金鉦壯其氣鼓鐘激其忿

鬱拂增其怒決列成其力不資此發勇不假此振威何  
能摧鳴條之戰拉牧野之師乎今與煩惱共戰當集無  
漏之智命無畏之師控道品之衆禦六度之侶建道場  
之幡擊甘露之鼓著弘誓鎧胄被忍辱袍甲握智慧弓  
刀執堅固箭看精進督怠惰翹勤課不及登行登懽喜  
稅駕頓法雲種智斷其勇方便運其畧於是無明老死  
之賊協附四魔之軍影響波旬因倚天女憑帶鬼神億  
千萬衆擔山吐火雷電四繞欲入閻惑之旅退金剛之

師由乎菩薩忍調無想積德久善魔怨稽伏一念努力  
豁然大明非法王壞正法王勝此並經中之盛事若不  
努力何由辦也如人營家晨起夜寐劬勞督課便自室  
內盈實飢寒不切但能努力無所不濟出世妙行事不  
殊俗若小努力微復加意三明六通不足為難更運方  
便重課心形信順之忍漸深自至豈得空捨一生虛過  
三塗切已力無所施方復生悔何嗟及矣所以努力一  
門貫通前後位心極行唯此而已願幽明聖鑒照覽窮

途故敢發言託文現意

禮舍利寶塔門二十五

大聖詮化隨機感發譬若一音說法各得其解是故應以現生蒙利者所以降神母胎誕聖王宮應以出家蒙利者所以捨金輪位剃除鬚髮應以相好蒙利者所以現成正覺坐菩提樹應以實相蒙利者所以三轉法輪十二部經應以滅度蒙利者所以雙樹潛輝現於涅槃良由衆生障業煩多是故聖化隨應不一然則現於涅槃

槃者復是增發悲戀之心以悲慕故善心濃到凡禮拜  
像塔皆宜感發悲心潜然思慕慘切其情追想正法我  
不餐仰泣想如來不親音旨如入祖禰之廟覩靈若在  
獻歎無顏如來慇懃令我等具諸苦行而我違背自墮  
惡道在於像末未蒙解脫以苦報故憶如來恩是以今  
各歸心於此像塔嗚咽涕零慚顏哽慟至心奉為至尊  
皇后皇太子七廟聖靈今日信施龍神八部廣及一切  
劇苦衆生敬禮十方三世一切諸刹土中所有如來形

像靈廟敬禮釋迦如來一切現在靈骨舍利敬禮如來  
現在頂骨舍利敬禮如來現在鏤蓋舍利敬禮如來現  
在眼睛舍利敬禮如來現在一切紺髮紅爪舍利敬禮  
如來現在一切指骨舍利敬禮如來現在一切牙齒舍  
利敬禮如來現在衣鉢水瓶錫杖衆具敬禮過去四佛  
生地并行坐遺迹敬禮如來得道樹寶塔敬禮如來轉  
法輪處寶塔敬禮如來般涅槃處寶塔敬禮如來滅後  
阿育王造八萬四千塔敬禮阿育王所造無量諸佛像

敬禮天上人間海中龍宮一切像塔敬禮此國諸州諸  
瑞聖像敬禮此國諸寺諸山無量靈像敬禮天上人間  
海中無量形像願一切衆生不在佛前佛後常見佛生  
常見佛出家常見佛得道常見佛涅槃能建立是無量  
像塔盡於來際佛事不絕

敬重正法門二十六

諸法本空寂滅無說以因緣故現有文字當知文字經  
典本在破病滅惑為先惑既八萬四千故使教門亦有



八萬四千法藏至於病銷惑遣藥亦隨亡如椹喻者可  
以情悉然羣生沈罔隨言封滯由此見故教藥常陳所  
以金簡盈於寶殿玉軸煥於神宮辯析空有於假實表  
發權智於無方故如來一代四十九年隨緣示教種種  
說法及於涅槃但有聲教計隨言說必致淪亡然以義  
理談玄正宗無昧言雖得喪金旨難乖故立法依用永  
判定天魔外道莫敢侵陵自慧日已沈法雲遐布非夫  
簡冊無由獻功尊大迦葉法門英雋擊鐘聲告召集無

學千僧一夏撰結遺言十二義求三藏文攝多羅葉典  
其量莫思蘊積西夏將及千載時運漸染東翻漢朝沿  
彼至今年垂六百雜錄正經七千餘卷詞義明敏談味  
無遺近則安國利人遠則超凡證聖備如卷部智者尋  
之至心奉為至尊皇后皇太子七廟聖靈天龍八部乃  
至十方一切劇苦衆生敬禮一切真如法藏敬禮十方  
一切諸所說法藏敬禮過去一切諸佛法藏敬禮賢劫  
初佛拘樓孫如來天龍宮法藏敬禮拘那含牟尼佛天

龍宮中法藏敬禮迦葉佛天龍宮中一切法藏敬禮釋  
迦如來天龍宮一切法藏敬禮西印度黑峰山寺一切  
法藏敬禮沮渠國大乘十二部法藏敬禮北印度石壁  
八字捨身法藏敬禮神州大國一切衆藏經典敬禮易  
州石經朔州恒安石窟經像敬禮一切受持三藏諸法  
師等敬禮一切禪師律師讀誦經典諸行人等願一切  
含靈入如是法門常能總持廣說教化通達無礙

奉養僧田門二十七

僧稱福田羣道宗尚斯何故耶良由發蒙俗之幽心啓  
正道之遐趣拯沈淪而將濟於三尼御法網而弘護於  
萬齡由是道被天下德光四俗能生善種號曰福田德  
響捷槌又稱應供心乖理義行越法科則顯乖剝落之  
容幽受空樹之譬及與施主為讐隙與骨肉為瘡疣熱  
血之相可尋石女之倫不遠僧護佛藏明言不迷智論  
大經清範攸屬固當日須三省事必九思念念策心無  
時寧舍方可入三乘之一位預三寶之一員盛德可觀

六道歸依而出有高行難擬七衆相從為福田豈非形  
寄域中情超域外者也流俗纏糾封附昏迷處處生著  
何能遠出是以樹立僧寶為俗良田令興福力得出生  
死不徒設也然佛超累表作範區中為物受供而實不  
受法在除惑清淨非情供養感果自隨生業僧舍凡聖  
形繫往因縱成無學猶嬰善報身謝無餘方出諸有今  
以形累有緣多須資待故凡施者教多在僧然供養於  
僧備有三寶故佛有言隨順我語供養佛也為解脫故

供養法也衆僧受用供養僧也有斯理義故名衆僧良  
福田矣奉為至尊皇后皇太子七廟聖靈天龍八部乃  
至十方一切劇苦衆生敬禮十方一切僧寶敬禮當來  
下生佛兜率天彌勒菩薩僧敬禮遊方大士文殊師利  
菩薩僧敬禮護法大士普賢菩薩僧敬禮十方一切行  
大道心菩薩僧敬禮十方一切行緣覺心辟支佛僧敬  
禮十方一切行下乘者諸聲聞僧敬禮賓頭闍住法萬  
載諸聲聞僧敬禮佛子羅睺羅住法萬載諸聲聞僧敬禮

剎州山海九億萬住法萬載諸聲聞僧敬禮三千界內  
見在一切諸凡聖僧願一切含靈常與賢聖同乘正道  
開智生福不墮惡趣生生遭遇為善知識拔除煩惱得  
出諸有

勸請增進門二十八

勸請者慇懃之至意也由發慇懃之意則願善之情深  
矣是故於一切纖微之善咸須慇懃勸請增進令生慧  
行不容中廢然勸請有二勸請衆生修行戒善具諸德

本勸請諸佛救護衆生說法久住十方四惡趣我今悉  
勸請修持諸戒行獲得於人身十方一切人我今悉勸  
請修十善業得生於天上十方諸天人我今悉勸請登  
立正定聚得離於惡道十方諸學人我今悉勸請覺察  
諸煩惱速證無學地十方阿羅漢我今悉勸請知非究  
竟位唯有一佛乘十方辟支佛我今悉勸請成就大悲  
智教化諸衆生人天二乘衆我今悉勸請體覺如來藏  
修習菩薩行一切諸菩薩我今悉勸請修行十度行速



登於十地兜率天菩薩我今悉勸請常轉不退輪速下  
度羣生菩薩智未明我今悉勸請金剛滅塵累顯發真  
實相十方一切佛初成正覺者我請轉法輪安樂諸衆  
生十方一切佛若欲捨壽命我今歸命請願久住於世  
如是佛菩薩我今皆勸請發此慇懃心是故稽首禮

隨喜萬善門二十九

衆生以愚惑故多懷嫉妬增上之心是以見人行善則  
興惡想摧毀破壞不令成就然彼前人未必損行而此

嫉者妄增惱熱增長惑業生死不絕是以聖人調心制  
意行此隨喜亦復勸請衆生如說奉行十方一切衆所  
有微細善仁義及禮智孝養謙恭敬慈和及愛敬廉貞  
清潔行若有如是善我今悉隨喜離欲在家人奉修如  
來戒三歸五八戒十善菩薩戒清淨諸律儀離惡名聞  
者如是諸功德我今悉隨喜飯僧施法衣浴除煩惱垢  
救攝諸貧窮飢寒窮塞者疾病艱危苦施藥

原闕

如

是諸功德我今悉隨喜曠路作好井橋船度人物

原闕

果施佛并供僧渴乏除熱惱其福實無量如是等  
功德我今悉隨喜造經流法教燃燈發慧明習誦及轉  
讀決子諸義趣若復為人說倍增歡喜心如是諸功德  
我今悉隨喜建立諸塔廟堂殿及寶刹彩畫及木像金  
銀銅石等傳寫諸相好顯示於法身如是諸功德我今  
悉隨喜若有造僧坊牀帳及臥具令彼息心者安意於  
禪林出入苦空門次第寂滅觀如是諸功德我今悉隨  
喜如來大慈悲善說諸法門發生隨喜行令我等修學

隨喜諸聲聞忍苦度生死隨喜諸菩薩不捨惡道受隨喜十方佛無畏天人尊能於三界獄引出諸衆生願令衆生類悉得於佛道是故我隨喜稽首禮諸佛

迴向佛道門三十

言迴向者以不著為義原一切衆生備修萬行捨身命財所以不得解脫生死者皆緣耽著果報不能捨離若能不執其心修行攝度隨有微福迴施羣生向於佛道者則於果報不復生著便於生死蕭然解脫故經云如

所說修行迴向為大利是以一切所作善業皆因迴向  
兼勸衆生不著果報何者即此身形果報之本終日養  
飼莊嚴彫飾要必當死徒為保著自非愚闇所以貧受  
此身少有慧明何得無時不厭以是智者撫臆論心不  
容貪著迴流生死十方諸衆生所行微善業仁孝及謙  
敬慈愛柔和等忠正修禮智矜逮賑孤窮如是世俗善  
悉迴向佛道一切諸外道種種勤苦行五熱炙其身投  
巖赴水火反縛塗炭等無量諸邪見今皆為迴向同歸

正覺道一切清信士歸戒行十善乃至諸女人亦能修  
福德又能善說法開化衆妙福迴向施羣生共成無上  
道一切弟子衆聞聲即解悟善來成比丘乃至四道果  
方便及初觀苦空非常想亦迴施羣生共向無上道十  
方諸辟支自然成緣覺深悟在別世曉了因緣法隱顯  
化衆生獨處樂善寂如是兼一切盡迴向佛道十方諸  
菩薩讀誦於經法入禪出禪者勸總行衆善如是等三  
善一切衆德本亦迴施衆生歸向無上道一切諸善本

乃至賢聖果解空未能窮有無不雙盡悉令於一切同  
入真妙境著迴有相心皆向解脫道如是諸菩薩我今  
勸迴向發此無著心是故稽首禮

發願莊嚴門三十一

原衆惡所起皆緣意地貪瞋癡也自害害他勿過於此  
故經號為根本三毒能煩能惱勞擾身心於緣起惡三  
三九種然此九種義通善惡三善根生名善業道三不  
善根生名惡業道是故行人常一其心不令動亂微起

相見即自覺察寸護人根不令塵染常發弘願以自莊  
嚴願一切衆生皆從今日乃至菩提眼常不看貪婬邪  
艷惑人之色不看瞋恚醜狀屠裂愚癡疑闇倨慢邪衆  
之色願見一切十方常住法身之色菩薩下生八相之  
色如來相好聖衆和會善集之色願一切衆生耳常不  
聞悲啼愁嘆聲地獄苦楚聲餓鬼畜生受苦聲八苦交  
對聲四百四病起發聲八萬四千塵勞聲願耳常聞諸  
佛說法八音聲八萬四千波羅密聲三乘聖果十地功



德如是等聲願一切衆生鼻常不聞殺生滋味飲食之  
氣三十六物革囊之氣發欲羅綺脂澤之氣五辛能熏  
九相尸氣願鼻常聞十方世界諸樹草木之香五戒八  
戒十善六念諸德香學無學人十地五分十力八萬四  
千諸度無漏之香十方諸佛說法之香願一切衆生舌  
恒不嘗衆生有命身肉雜味能生煩惱滋味願舌恒嘗  
甘露不死之味天自然食在其舌根變成上味諸佛所  
食之味法喜禪悅之味解脫泥洹最上勝味願一切衆

生身常不覺邪姪細滑生欲樂觸不覺獲湯寒水之觸  
餓鬼畜生諸苦惱觸脫百四病寒熱風霜蚤蚤虱飢  
渴諸苦等觸願身常覺清涼強健心悟安隱證道飛行  
八自在觸願一切衆生皆從今日乃至菩提意常覺知  
九十八使八萬四千塵勞之法十惡五逆九十六種邪  
師之法三塗可厭生死大苦願意常知一切衆生皆有  
佛性佛為醫王法為良藥僧為看病者為諸衆生治生  
死患令得解脫心常無礙空有不染

七

賓僚七要

松既煙而接漢竹綠嶺而負筠哀過鴻於月曉悲夜猿  
於霜旻乃鶴駕之非遠信羽車之可鄰鴻池廣象太液  
漆華勢含五水氣疏九河既百尋而照底亦千丈而分  
沙故乘流以神王或鼓地而目多豈能從我汎此安波

詩

九月侍宴

月殿風轉層臺氣寒高雲斂色遙露已團式詔司警言  
戾秋巒輕觴時薦落英可食

侍皇太子釋奠宴

霜輕流日風送夕雲雕檐結綵綺井生文四璉合旨八

簋舒芬

闕

遊後園

託性本禽魚棲情閒物外蘿徑轉連綿松軒方杳藹丘

壑每淹留風雲多賞會

闕

行宅 并序

余稟性端疎屬愛閒外往歲羈役浙東備歷江山  
之美名都勝境極盡登臨山原石道步步新情迴  
池絕澗往往舊識以吟以詠聊用述心

訪宇北山阿卜居西野外幼賞悅禽魚早性羨蓬艾  
闕  
登山望雷居士精舍同沈右衛過劉先生墓下

作 并序。一作同隨王  
經劉先生墓下作

沛國劉子珪學優未仕跡邇心遐履信體仁古之

遺德潛舟迅景滅賞淪輝言念方猷式懷嗟述屬  
舍弟隨郡有示來篇彌纘久要之情益深宿草之  
嘆升望西山率爾為答雖因事雷生實申悲劉子

云爾

劉瓛字子珪沛郡  
相人南史有傳

漢陵淹館蕪晉珍

一作  
爾

洙風缺五都聲論空三河文義

絕興禮邁前英談玄踰往哲明情日夜深徽音歲時滅  
垣井總已平煙雲從容裔爾嘆牛山悲我悼驚川逝

漢魏六朝百三家集卷七十四